


युहन्नक लिखल
तीनठो चिठी



यूहन्नक लिखल

तीनठो चिठी

(दङ्गौरा थारू)

२०६६

John's Written

Three Letters

Trial Edition

2013

(500 Copies)

Illustration on cover by

Horace Knowles, revised by Louise Bass

© The British & Foreign Bible Society, 1994

Used with permission.

Dangaura Tharu Language and
Literature Project and
Dangaura Tharu Translation Committee

यूहन्नक लिखल

पैल्ह चिठी

चिठीक परिचय

यी चिठी जब्दियक छावा यूहन्ना लिखलह, जे पैल्ह एकठो पेशक रुपम मच्छी मरुइया रलह ओ पाछ येशूक बाह जन चेलामध्ये एकठो चेला हुइल (मर्कूस १:१६-२०)। ऊ लौव नियमक पाँचठो किताब लिखलह- “यूहन्नक लिखल खुशिक खबर,” यूहन्नक लिखल पैल्ह, द्वासर ओ तीसर चिठी ओ “प्रकाश”। धेरजसिन बाइबल विद्वानहुँकन्हक विचारम यूहन्ना यी चिठी पैल्ह शताब्दिक अन्त्यओर लिखलह।

यूहन्ना यी चिठी क्याकर लाग लिखल कना सम्बन्धमा चिठीम स्पष्ट रुपले उल्लेख कैगिल् नैहो। तर परम्परागत बुभाइ अनुसार ऊ आपन जीवनक अन्त्यओर (लगभग सन ७०-१०० ओर) एफिसस शहरम रहँट ओ वाकर आसपासम रहल धेर मण्डलीम उहँसे सेवा पुगाइँट।

उ समयम कुई-कुई भुटा शिक्षकहुँक येशू ख्रीष्ट एकठो मनैयाअस केल देखपरँट, तर उहाँ वास्तविक मनैया नैरलह कैक सिखाइँट। और कत्रा जनजुन येशू मनैया केल रलह तर ख्रीष्ट नैरलह कैक सिखाइँट। यूहन्ना यी चिठी खासकैक उह भुटा शिक्षा सिखुइयन्हक विरोध करक लाग लिखलह। ऊ येशू मनैया रलह कना बारेम अपन उहाँह देखलक, छुलक ओ उहाँसे वचन सुन्नलक बातले स्पष्ट पाररखल, ओ येशू जो ख्रीष्ट रलह कैक लिखरखल। ऊ येशूकम विश्वास करुइयन सब जन अनन्त जीवन पारखल कना बात पक्का देहक लाग यी चिठी लिखलह। परमेश्वरकम विश्वास करल मनै पाप कर्ती रहनैपरट ओ एक-औरजहन प्रेम करपर्ठा कना बातम फे जोड् देरखल।

विषयसूचि

जीवन देहुइया वचन १:१-४

ज्योतिम नेङ्गना ओ अन्धकारम नेङ्गना १:५-२:१४

संसारह प्रेम जिन करो २:१५-१७

ख्रीष्ट विरोधी भुट हो २:१८-२७

परमेश्वरक सन्तान ओ शैतानक सन्तान २:२८-३:१०
 एकऔरजहन प्रेम करपठा ३:११-२४
 सत्य आत्मा ओ भूट आत्मा ४:१-६
 परमेश्वरक प्रेम ओ हमार प्रेम ४:७-२१
 परमेश्वरक छावाद्वारा अनन्त जीवन ५:१-१२
 अनन्त जीवनक निश्चित हुइना ५:१३-२१

जीवन देहुइया वचन

१ हम्न शुरूसे रहुइयक बारेम तुहन प्रचार कठी। हम्न उहाँक बात सुनरख्ली, उहाँह आपन आँखिले देखरख्ली, निहारक हेररख्ली, ओ हाँठले छुरख्ली। उहाँ मनैन जीवन देहुइया वचन हुइत। २ उ जीवन देहुइया प्रकट हुइल। हम्न उहाँह देखरख्ली ओ उहाँक बारेम साक्षी देठी, ओ उ अनन्त जीवनक बारेम तुहन प्रचार कठी। उहाँ शुरूसे परमेश्वर बाबकसँग रलह ओ हमारठे प्रकट हुइल। ३ हमारसँग दुन्हक सङ्गति हुइ स्याक कैक हम्न आपन द्याखल सुनल व्यक्तिक बारेम तुहन प्रचार कठी। हमार सङ्गति त परमेश्वर बाबा ओ उहाँक छावा येशू ख्रीष्टकसँग बा। ४ हमार धेरसे धेर आनन्द हुइ स्याक कैक हम्न यी बात लिखटी।

ज्योतिम नेङ्गना ओ अन्धकारम नेङ्गना

५ हम्न उहाँसे सुनल सन्देश त तुहन प्रचार कठी। उ का हो कलसे - परमेश्वर ज्योति हुइत, ओ उहाँकम एक्को फे अन्धार नैहो। ६ यदि हम्न परमेश्वरसे हमार सङ्गति बा कने अन्धकारम नेङ्गने कठी कलसे, हम्न भूट बोलठी ओ सत्यम नैचलटी। ७ तर यदि उहाँ ज्योतिम रहलअस हम्न फे ज्योतिम नेङ्गठी कलसे, हम्न एकऔरजहनसे सङ्गति कठी, ओ उहाँक छावा येशूक रगत हमन सब पापमसे शुद्ध पठा।

८ यदि हम्न हमार मन पापी नैहो कठी कलसे, हम्न अपन्हेह ध्वाखा देठी ओ हमार मनम सत्य नैरहट। ९ तर यदि हम्न आपन पाप स्वीकार कर्ली कलसे, उहाँ हमार पाप क्षमा कैदेठ ओ हमन सब अधर्मसे शुद्ध पठ, काकरकि उहाँ विश्वासयोग्य ओ न्यायी बाट। १० यदि हम्न पाप कर्ल नैहुइटी कठी कलसे, हम्न उहाँह भूट ठहैठी ओ हम्न उहाँक वचनह आपन जीवनम काम कर नैदेटी।

२ हेरो लर्काओँ, तुह पाप जिन करो कना उद्देश्यले मै यी बात तुहन लिखटीबाटुँ। तर यदि कुई पाप कैडारल कलसे फे, हमार पक्षम परमेश्वर बाबकठे बिन्ती

कैदेहुइया एकठो धर्मी जन बाट। उहाँ येशू ख्रीष्ट हुइट। २ उहाँ हमन पापक दण्डसे बचाइक लाग बलि हुइलह, ओ हमन केल नाहीं, तर सारा संसारह बचाइक लाग बलि हुइलह।

३ यदि हम्र उहाँक आज्ञापालन कर्ली कलसे, हम्र उहाँह चिनरख्ली कना बात जातसे थाहाँ पाइसेक्ठी। ४ मै उहाँह चिनरख्लु कना तर उहाँक आज्ञाजुन पालन नैकर्ना मनैया भुट बोलुइया हो, ओ ऊ सत्य हिसाबले नैचलट्। ५ तर परमेश्वरक वचन पालन करुइयन उहाँह पूरा प्रेम कर्ठ। यैहँमसे हम्र उहाँकम बाटी कैक निश्चित हुइठी।+ ६ उहाँकम रठुँ कहुइया येशूकअस जीवन जीएपठा।

७ प्रिय भैयौ, मै टुहन कौनो लौव आज्ञा नैलिखटुइँ, तर टुह शुरुसे सुन्टीआइल उह पुरान आज्ञा हो। ८ तर फे, एकठो लौव आज्ञा मै लिखटुँ, जौन सत्यता येशू ख्रीष्टक ओ टुन्हक जीवनम प्रमाणित हुइल्, काकरकि अन्धकार हेरैटीजाइटा ओ ज्योतिजुन आघहँसे चम्क भिररहल।

९ ज्योतिम बाटुँ कना तर विश्वासी भैयह हेल्हा कर्ना मनैया आम्ही फे अन्धकारम जो बा। १० आपन भैयह प्रेम करुइया ज्योतिम रठा, ओ वाकरम ट्यास लगना कुछु कारण नैरटस। ११ तर आपन भैयह हेल्हा करुइया अन्धकारम पलबा, ओ अन्धकारम जो नेङ्गटीबा। ऊ अन्धकारम कुछु फे नैदेख्लकओसे अप्न कहाँ जाइटा कैक थाहाँ नैपाइट्।

१२ हेरो लर्काओँ, येशू ख्रीष्टद्वारा

टुन्हक पाप क्षमा हुइलक कारण

मै टुहन यी लिखटु।

१३ मै टुह बाबा सरहक परिपक्व मनैन यी लिखटु,

काकरकि टुह शुरुसे रहुइयह चिनरख्लो।

मै टुह जवान हुइल् मनैन यी लिखटु,

काकरकि टुह दुष्ट शैतानह जितरख्लो।

१४ हेरो लर्काओँ, मै टुहन यी लिखटु,

काकरकि टुह परमेश्वर बाबह चिनरख्लो।

मै टुह बाबा सरहक परिपक्व मनैन यी लिखटु,

काकरकि टुह शुरुसे रहुइयह चिनरख्लो।

मै टुह जवान हुइल् मनैन यी लिखटु,

+ २:५ "उहाँकम बाटी" कलक उहाँसे हमार सम्बन्ध अत्रा घनिष्ठ बा कि हम्र उहाँसे एक बाटी।

काकरकि टुह विश्वासम बलगर बाटो,
ओ परमेश्वरक वचन टुन्हक जीवनम काम कर्ठा,
ओ टुह दुष्ट शैतानह जितरख्लो।

संसारह प्रेम जिन करो

१५ संसारह या संसारम रहल कौनो चिजह प्रेम जिन करो। यदि कुई संसारह प्रेम कर्ठा कलसे, ऊ परमेश्वर बाबह प्रेम कर नैस्याकट्। १६ काकरकी संसारम रहल चिज कलक शरीरक पापी चाहना, आँखिले देख्क लग्ना लालच, धनसम्पत्तिक कारण अइना घमण्ड हो। असिन चिज परमेश्वर बाबकठेसे नैआइट्, तर संसारमसे अइठा। १७ संसार ओ संसारप्रतिक चाहना हैरैटीजाइटा, तर परमेश्वरक इच्छाअनुसार चलुइया सडुभर पलरहुइया बा।

"ख्रीष्ट विरोधी" भुट हो

१८ हेरो लर्काओं, संसारक यी अन्तिम समय हो। "ख्रीष्ट विरोधी" अइटीबा कैक टुह सुनरख्लो, ओ धेर "ख्रीष्ट विरोधीहुँक" पैल्हहें आरल। उहओसे हम्र यी अन्तिम समय हो कैक जन्ठी। १९ हुँक हमार मण्डलीमसे निकर्क गैल, वास्तवम हुँक हमार बगालिक नैरलह। यदि रट कलसे, हुँक मण्डलीमसे निकर्क जैनेनिरलह। हुँक गैल त, जाट्टिसे हमार बगालिक नैरलह कना बात प्रमाणित हुइल।

२० तर ख्रीष्ट त टुहन पवित्र आत्मा देरख्ल, ओ टुह सब जन सत्य बात जन्ठो। २१ टुह सत्य बात नैजन्टो कैक नाहीं, तर टुह सत्य ओ भुट अल्गाइ सेकना हुइलकओसे लिखटु। २२ येशू जो ख्रीष्ट हुइट कैक इन्कार करुइया भुट हो। परमेश्वर बाबह ओ उहाँक छावह इन्कार करुइया "ख्रीष्ट विरोधी" उह हो। २३ छावह इन्कार करुइयकम बाबा नैरट। छावह स्वीकार करुइयकम बाबा फेरठ।

२४ शुरुसे टुहन सिखागैल् बात आपन मनम ढर्लरहो। ढर्लरलो कलसे, टुह छावकम ओ बाबकम रठो। २५ ओ उहाँक बाचा करल बात यिह हो- अनन्त जीवन।

२६ मै यी सब बात टुहन छल करुइयन्हक बारेम टुहन चेतावनी देहक लाग लिखटुं। २७ तर टुह त पवित्र आत्मा पारख्लो, ओ उहाँ टुन्हकम पलरठ। उहओसे कुई फे टुहन सत्य बात सिखाइपर्ना जरुरी नैहो। काकरकि टुह जान पर्ना सब बात उहाँ टुहन सिखैठ ओ उहाँक सिखाइल बात भूट नैरहट्। उहाँक सिखाइल अनुसार ख्रीष्टकम पलरहो।

परमेश्वरक सन्तान ओ शैतानक सन्तान

२८ हेरो लर्काओं, ख्रीष्ट फेदोस्र अइहीं त हम्न निडर हुइबी ओ हमन लजाई नैपरी कैक ख्रीष्टकम पलरहो।

२९ ख्रीष्ट धर्मी बाट कैक टुह जन्ठो। उहओसे ठीक काम करुइयन परमेश्वरक सन्तान हुइट कना बात फे टुह जान पठा।

३ हेरो, परमेश्वर बाबा हमन कत्रा धेर प्रेम कैरखल, यहाँसम कि उहाँ हमन आपन सन्तान कठ! ओ हम्न जाटिसे उहाँक सन्तान हुइटी। संसारक मनै परमेश्वरह नैचिन्हलकओसे हमन फे नैचिन्ह। २ प्रिय भैयौ, आब हम्न परमेश्वरक सन्तान जो हुइटी। पाछ हम्न कसिन हुइबी कना बात आम्हीसम प्रकट कैगिल् नैहो। तर उहाँ अइहीं त हम्न उहाँकअस हुइबी कना बातभर हमन थाहाँ बा काकरकि उहाँ जसिन बाट हम्न उहाँह ओस्तहँ देख्बी। ३ उहाँकम यी आशा करुइयन सब जन अपन्हेह उहाँकअस पवित्र बनैठ।

४ पाप करुइया हरेक व्यक्ति परमेश्वरक नीतिनियम उल्लङ्घन कर्ठा। वास्तवम सारा पाप परमेश्वरक नीतिनियम उल्लङ्घन कर्ना हो। ५ हमार सारा पाप हटाइक लाग ख्रीष्ट अइलह ओ उहाँकम पाप नैहुइटन कना बात टुहन थाहाँ बा। ६ उहाँकम रहुइया कुइ फे पाप कर्टी नैरहट्। पाप कर्टी रहुइया ना त उहाँह देख्लहो ना त चिन्हलहो।

७ हेरो लर्काओं, यी बातम कुइ टुहन जिन भर्माए। ठीक काम कर्ना मनैया ख्रीष्टकअस धर्मी हो। ८ पाप कर्टीरना मनैया शैतानक सन्तान हो। काकरकि शैतान त शुरुसे पाप कर्टी आइल बा। शैतानक काम नाश करक लाग जो परमेश्वरक छावा यी संसारम अइलह। ९ परमेश्वरक सन्तान हुइल् मनै पाप कर्टी नैरट, काकरकि हुँकन्हकम परमेश्वरक स्वभाव रठन। हुँक परमेश्वरक सन्तान हुइलकओसे पाप कर नैसेक्ट। १० असिक परमेश्वरक सन्तान के हो ओ शैतानक सन्तान के हो कना बात स्पष्ट रूपले चिन्ह सेक्जैठा। ठीक काम नैकर्ना ओ आपन डाडुभैयन प्रेम नैकर्ना मनैया परमेश्वरक सन्तान नैहो।

एकऔरजहन प्रेम करपठा

११ टुह शुरुम येशू ख्रीष्टकम विश्वास करल समयसे सुन्टी आइल सन्देश यिह हो: “हम्न एकऔरजहन प्रेम करपठा।” १२ कयिनअस जिन होओ। ऊ त शैतानक मनैया रह, उहओसे आपन भैयक हत्या करल। ऊ आपन भैयक हत्या काजे करल? काकरकि वाकर काम खराब रलहस् ओ वाकर भैयक काम असल रलहस्।

१३ हेरो भैयौ, यदि संसारक मनै टुहन हेल्हा करहीं कलसे, अचम्म जिन मानो। १४ एक और जहन कर्लक प्रेमले हम्म मृत्युमसे जीवनम सररली कना बात देखैठा। तर प्रेम नैकर्ना मनै आम्हीसम मृत्युक अधीनम पलबाट। १५ और जहन हेल्हा करुइया त हत्यारऽ हो, ओ कौनो हत्यारकसँग अनन्त जीवन नैरहट कना बात टुह जन्ल जो बाटो।

१६ प्रेम का हो कना बात हम्म असिक बुभरख्ली, येशू ख्रीष्ट हमार लाग आपन प्राण देल। उहओसे हम्म फे और जन्हक लाग आपन प्राण देहपठा। १७ यदि केक्रोटे संसारम जीएक लाग प्रशस्त धनसम्पत्ति बा, ओ ऊ और मनैयक खाँचो देखराखल, तर फे ऊ वाकरपर आपन मन कठोर पठा कलसे, परमेश्वरह प्रेम कर्तु कैक कसिक कह सेकी? १८ हेरो लर्काओं, हम्म बातले या मुहले केल प्रेम नैकरी, तर हमार प्रेम सत्य हुइपठा। असिन प्रेम व्यवहारद्वारा देखपठा। १९ यी हिसाबले प्रेम कर्ली कलसे, हम्म सत्य अनुसार चलटी कना बातम निश्चित हुइसेकठी ओ परमेश्वरक आघ निर्धक्क से ठट्ट्याइ सेकठी। २० हम्म दोषी रलक महसुस कर्लसे फे, परमेश्वर हमार करल महसुससे धेर महान बाट, ओ उहाँ सब बात जन्ठ।

२१ प्रिय संघारीहुँकर, यदि हम्म दोषी रलक महसुस नैकर्ली कलसे, हम्म परमेश्वरक आघ निर्धक्कसे आइसेकठी। २२ हम्म आपन माङ्गल चिज उहाँसे पैठी, काकरकि हम्म उहाँक आज्ञापालन कठी ओ उहाँह खुसी लगना जीवन जिठी। २३ उहाँक आज्ञा यह हो: हम्म उहाँक छावा येशू ख्रीष्टकम विश्वास करपठा, ओ उहाँ हमन देहल आज्ञाअनुसार एक और जहन प्रेम करपठा। २४ उहाँक आज्ञापालन करुइयन उहाँकम रठ, ओ उहाँ हुँकन्हकम रठ। उहाँ हमार जीवनम बाट कैक हम्म जन्ठी, काकरकि उहाँक देहल पवित्र आत्मा हमार जीवनम बाट।

सत्य आत्मा ओ भूट आत्मा

४ प्रिय संघारीहुँकर, पवित्र आत्मासे पाइल बात कैक दावी कर्ना ज्याकरत्याकर बातम विश्वास जिन करो, बेनसे उ बात परमेश्वरसे आइल हो कि नाही कैक जाँच करो। काकरकि धेर भुठा अगमवक्ताहुँकर यी संसारम बाट। २ परमेश्वरक आत्मा रहल मनैयह टुह असिक चिन्ह सेकठो: यदि अपन्हेह अगमवक्ता दावी करुइया व्यक्ति येशू ख्रीष्ट शरीरम यी संसारम अइल कैक स्वीकार कठा कलसे, वाकरम परमेश्वरक आत्मा बाटस। ३ यदि कुइ अपन्हेह 'मै अगमवक्ता हुइटु' कैक दावी कठा, तर येशूह स्वीकार नैकरट कलसे, ऊ परमेश्वरक आत्मा पाइल मनैया

नैहो। वाकरम ख्रीष्ट-विरोधीक आत्मा बाटस्। उ आत्मा अउइया बा कैक टुह सुनरख्लो, ऊ त यी संसारम आस्याकल।

४ हेरो लर्काओं, टुह परमेश्वरक हुइटो, ओ भुटा अगमवक्तन जितरख्लो, काकरकि टुन्हकम रना पवित्र आत्मा संसारम रना आत्मसे महान बाट। ५ हुँक, संसारक मनै हुइलकओसे, संसारक हिसाबले बात बटोइठ, ओ संसारक मनै हुँकन्हक बात सुन्ठन। ६ तर हम्न त परमेश्वरक मनै हुइटी, ओ परमेश्वरह चिन्हल मनै हमार बात सुन्ठ। जे परमेश्वरक मनैया नैहो, ऊ हमार बात नैसुनट्। असिक हम्न क्याकरम सत्य आत्मा बाट ओ क्याकरम भुट आत्मा बा कैक अल्गाइ सेकठी।

परमेश्वरक प्रेम ओ हमार प्रेम

७ प्रिय संघारीहुँक, हम्न एकऔरजहन प्रेम करी, काकरकि प्रेमक स्रोत परमेश्वर हुइट। प्रेम करुइया व्यक्ति परमेश्वरक सन्तान हो, ओ ऊ परमेश्वरह चिन्ठा। ८ प्रेम नैकरुइया व्यक्ति परमेश्वरह नैचिन्हट्, काकरकि परमेश्वर प्रेम हुइट। ९ परमेश्वर हमन असिक प्रेम देखैल, कि हम्न उहाँक छावाद्वारा जीवन पाइसेकी कैक उहाँ आपन एकठो छावह यी संसारम पठैल। १० प्रेम कलक यह हो, कि हम्न परमेश्वरह प्रेम कर्लक नैहो, तर उहाँ हमन प्रेम कर्ल ओ बलिदान हुइक लाग आपन छावह पठैल, जौन बलिदानद्वारा हमार पाप क्षमा हुइठा। ११ प्रिय संघारीहुँक, परमेश्वर हमन असिन प्रेम कर्ल कलसे, हम्न फे एकऔरजहन प्रेम करपर्ठा। १२ परमेश्वरह कुइ फे कब्बु नैदेख्लहो। तर यदि हम्न एकऔरजहन प्रेम कर्ली कलसे, परमेश्वर हमारम रठ, ओ उहाँक प्रेम हमारम पूरा होरहल।

१३ हम्न परमेश्वरकम रठी ओ उहाँ हमारम रठ कना प्रमाणक रूपम उहाँ हमन आपन पवित्र आत्मा देरख्ल। १४ परमेश्वर बाबा आपन छावह मनैन मुक्ति देहक लाग यी संसारम पठैल। हम्न उहाँक छावह देख्ली ओ आब उहाँक बारेम साक्षी देटीबाटी। १५ येशू परमेश्वरक छावा हुइट कैक स्वीकार करुइयकम परमेश्वर रठ ओ ऊ परमेश्वरकम रठा। १६ परमेश्वर हमन प्रेम कठ कना बात हम्न महसुस कैरख्ली, ओ उहाँक प्रेमम भर परल बाटी।

परमेश्वर प्रेम हुइट, उहओसे प्रेम करुइया परमेश्वरकम रठा ओ परमेश्वर वाकरम रठ। १७ हम्न परमेश्वरकम पलरली कलसे, हमार प्रेम पूरा होरहल। उहओसे न्यायक दिनम+ हमन डराइ नैपरी। काकरकि हम्न यी संसारम येशूकअस जीवन

+४.१७ परमेश्वर सारा जगतक अन्तिम न्याय कर्ना दिन हो। थप जानकारीक लाग "न्यायक दिन" शब्दक अर्थ हेरी।

जीठी। १८ प्रेमम डर नैरहट, काकरकि पूरा प्रेम डरह हटादेठा। यदि हम्र डरैठी कलसे, दण्डक डर डरैठी। यिहिले हमार प्रेम पूरा नैहुइलहो कना बात देखपर्ठा।

१९ हम्र प्रेम कर्ठी, काकरकि पैल्ह उहाँ हमन प्रेम कर्ल। २० यदि कुइ “मै परमेश्वरह प्रेम कर्तु” कठा, तर औरजहन हेल्हा कर्ठा कलसे, ऊ भुट हो। काकरकि आपन द्याखल मनैयह प्रेम कर नैसेकुइया व्यक्ति नैद्याखल परमेश्वरह कसिक प्रेम कर सेकी? २१ ओ उहाँ हमन यी आज्ञा देरख्ल: परमेश्वरह प्रेम करुइया व्यक्ति औरजहन फे प्रेम करपर्ठा।

परमेश्वरक छावाद्वारा अनन्त जीवन

५ येशू जो ख्रीष्ट हुइट कैक विश्वास करुइया हरेक मनैया परमेश्वरक सन्तान हो, ओ बाबह प्रेम करुइया मनैया उहाँक सन्तानन् फे प्रेम कर्ठा। २ यदि हम्र परमेश्वरह प्रेम कर्ठी ओ उहाँक आज्ञापालन कर्ठी कलसे, हम्र परमेश्वरक सन्तानन् प्रेम कर्ठी कना बात जान सेकठी। ३ परमेश्वरह प्रेम कर्ना कलक उहाँक आज्ञापालन कर्ना हो, ओ उहाँक आज्ञा भन्भट लगैना हिसाबक नैहुइटन। ४ काकरकि जे परमेश्वरक सन्तान हो, ऊ यी दुष्ट संसारह जितदेठ, ओ यी जित हमार विश्वासद्वारा हुइठा। ५ संसारह के जित सेकठा? येशू परमेश्वरक छावा हुइट कैक विश्वास करुइया केल जित सेकठा।

६ येशू ख्रीष्ट जब पानीम बप्तिस्मा लेल, ओ जब उहाँक मृत्युम रगत बहलन, तब उहाँ के रलह कना बात यी पृथ्वीम प्रकट हुइल। उहाँ पानीद्वारा केल नाहीं, तर पानी ओ रगतद्वारा प्रकट हुइल। ओ यी बातक साक्षी पवित्र आत्मा बाट, काकरकि पवित्र आत्मा त सत्य हुइट।+ ७ तीन तरीकाले उहाँक बारेम साक्षी देगैल् बा: ८ पवित्र आत्मा, पानी ओ रगत। यी तीन्यौ तरीकाले एक्क बातक साक्षी देगैल् बा। ९ मनैन्हक देहल साक्षी त हम्र विश्वास कर्ठी कलसे, परमेश्वरक देहल साक्षी त भन विश्वासयोग्य बा। परमेश्वर आपन छावक बारेम साक्षी देरख्ल। १० परमेश्वरक छावकम विश्वास करुइयन सब जन आपन मनम उहाँक देहल साक्षी सत्य हो कैक जन्ठ। तर परमेश्वरकम विश्वास नैकरुइयन उहाँह भुट मन्ठ, काकरकि आपन छावक बारेम परमेश्वरक देहल साक्षीम हुँक विश्वास नैकर्ट।

+ ५.६ यी पदक शाब्दिक अनुवाद: उहाँ उह जो हुइट, जे पानी ओ रगतद्वारा अइल। अर्थात् येशू ख्रीष्ट, जे पानीद्वारा केल नाहीं, तर पानी ओ रगतद्वारा अइल। ओ यी बातक साक्षी पवित्र आत्मा बाट, काकरकि पवित्र आत्मा त सत्य हुइट।

११ हमन देगैल् साक्षी यहि हो: परमेश्वर हमन अनन्त जीवन देरख्ल, ओ यी जीवनक स्रोत उहाँक छावा हुइट। १२ परमेश्वरक छावा रहइयकम जीवन बा, परमेश्वरक छावा नैरहुइयकम जीवन नैहो।

अनन्त जीवनक निश्चित हुइना

१३ टुह अनन्त जीवन पारख्लो कना बात जान सेको कैक टुह परमेश्वरक छावकम विश्वास करुइयन मै यी चिठी लिखटुँ। १४ परमेश्वरक इच्छा अनुसार ज्या मङ्गलसे फे उहाँ हमार प्रार्थना सुन्ठ कैक हमन पूरा विश्वास बा। १५ यदि हम्र प्रार्थनम ज्या मङ्गलसे फे परमेश्वर सुन्ठ कना बात जन्ठी कलसे, हमार माङ्गल सब चिज उहाँ देठ कैक फे जन्ठी।

१६ यदि कुइ आपन भैयह पाप करट् देख्ठा, ओ उ पापक नतिजा मृत्यु+ नैहो कलसे, ऊ वाकर लाग प्रार्थना कैदेहपठाँ ओ परमेश्वर ओहीह जीवन देहुइयाबाट। तर मृत्यु नतिजा अन्ना पाप फे बा, ओसिन पाप करुइयक लाग प्रार्थना कैदेहपठाँ कैक मै नैकहठुइटुँ। १७ सब खराब काम पाप हो, तर हरेक पाप मृत्यु नतिजा नैआनट्।

१८ परमेश्वरक सन्तान हुइल् मनैया पाप कर्टिनैरहट कना बात हमन थाहाँ बा। काकरकि परमेश्वरक छावा वाकर सुरक्षा कर्ठ, ओ शैतान ओहीह छुव नैस्याकट्। १९ हम्र परमेश्वरक सन्तान हुइटी, ओ सारा संसार शैतानक अधीनम बा कैक हमन थाहाँ बा। २० परमेश्वरक छावा आरल ओ हमन सत्य परमेश्वरह चिन्हना समभशक्ति देरख्ल कना बात फे हमन थाहाँ बा। हम्र सत्य परमेश्वरकम बाटी काकरकि हम्र उहाँक छावा येशू ख्रीष्टकम बाटी। मनैन अनन्त जीवन देहुइया सत्य परमेश्वर उहाँ जो हुइट।

२१ हेरो लर्काओँ, देवीदिउँतनसे† अलग रहो।

+ ५.१६ यिहाँ उल्लेख हुइल् “मृत्यु” शब्दले सम्भवतः शारीरिक मृत्यु नैजनाइट, तर अनन्तसम परमेश्वरसे अलग हुइना बात जनेठा। मृत्यु नतिजा अन्ना पाप कलक क्षमा नैहुइना पाप हो, जसिन कि येशू ख्रीष्टकम विश्वास नैकर्ना (१ यूहन्ना ५:१२), या सम्भवतः औरजहन प्रेम नैकेक जीवन जीना (१ यूहन्ना ३:१४)। यिहींले उँ मनैया परमेश्वरह प्रेम नैकरट् कनी बात जनेठा।
† ५.२१ यहन्ना “पाप” जनाइक लाग यिहाँ आलङ्कारिक हिसाबले “देवीदिउँता” शब्द प्रयोग कैरख्ल। असिन आलङ्कारिक प्रयोग पुरीन नियमम फे बा। सत्य परमेश्वरसे दूर लेजेना ज्या चिज फे देवीदिउँताअस हो।

यूहन्नक लिखल

द्वासर चिठी

चिठीक परिचय

धेर जसिन बाइबल विद्वानहुँक यी चिठी प्रेरित यूहन्ना लिखलह कैक विचार कर्ठ। ऊ अपन्हेह “एल्डर” कठ (पद १)। विद्वानहुँकन्हक विचारम “महिला” कलक एकठो मण्डली ओ हुँकाहार “छाई-छावन” कलक उ मण्डली सदस्यहुँक रलह। जे होस्, पैल्ह शताब्दिक अन्त्यओर लिख्गैल् यी चिठीम खास कैक विश्वासीहुँक एक औरजहन प्रेम करपर्ना ओ भूटा शिक्षकहुँकनसे सावधान रहपर्ना बात लिख्गैल् बा।

१ मै, एल्डर,

परमेश्वरक चुनल महिलह ओ हुँकाहार छाई-छावन यी चिठी लिखटु, जेहीह मै जाट्टीसे प्रेम कर्ठु। मै केल नाहीँ, तर सत्यह चिन्हना सबजन टुहन प्रेम कर्ठ।
२ काकरकि सत्य हमारम बा ओ सड्ड रने बा।

३ परमेश्वर बाबा ओ उहाँक छावा येशू ख्रीष्टसे अइना अनुग्रह, दया ओ शान्ति हम्र सत्य अनुसार प्रेमम चलुइयनसे पलरहुइया बा।

४ टुँहार छाई-छावनमध्ये कत्राजहन परमेश्वर बाबक देहल आज्ञा अनुसार सत्यम चलट् देख्क मै धेर आनन्दित बाटु। ५ हेरो बाबु, मै कौनो लौव आज्ञा नैलिखटुइटु, तर हम्र सब जन एक-औरजहन प्रेम करपर्ठा कैक शुरुम हमन सिखागैल् आज्ञा लिखटु। ६ प्रेम कर्ना जो उहाँक आज्ञा अनुसार नेङ्गना हो। टुह शुरुसे सुनल् आज्ञा यिह हो, कि टुह सबजन प्रेम अनुसार चलपर्ठा।

७ काकरकि औरजहन भ्रमम पर्ना मनै यी संसारम धेर जन आरल, जे येशू ख्रीष्ट शरीरम अइल कैक स्वीकार नैकर्ट। असिन मनै जो भुट ओ ख्रीष्ट विरोधी हुइट।

८ उहोओसे होशियार रहो, जौन चिजिक लाग काम करटो+ उ जिन हेराओ तर पूरा इनाम पाइसेको। ९ ख्रीष्टक शिक्षासे सिमा नाहाङ्क बाहार जैना मनैयकसँग परमेश्वर नैरट, तर उहाँक शिक्षाम लगल रना मनैयकसँग परमेश्वर बाबा ओ छावा दुनु जन रठ। १० यदि कुई ख्रीष्टक असिन शिक्षा नैदेहुइया टुन्हकठे आई कलसे, ओसिन मनैयह आपन घरम जिन बलैहो ओ नमस्कार फे जिन करहो। ११ काकरकि ओहिह जयमसिह कर्ना त वाकर खराब कामम सहभागी हुइना हो।

१२ मै टुहन लिख पर्ना बात त धेर बा, तर मै चिट्ठीम लिख नैचाहटु, बेनसे टुन्हकठे जाक आमनेसामने बात बट्वाँना आशा करटु, ताकि हमार आनन्द पूरा हुइस्याक।

१३ परमेश्वरसे चुनगैल् टुहाँर बहिनेक छाइ-छावन फे टुहिँन नमस्कार कैरख्ल।†

† १.८ ग्रीक भाषक कौनो-कौनो स्रोतम "काम करटो" रहल ठाउँम "काम करटी" कैक उल्लेख हुइल बा।

† १:१३ यी १ पदअसक बा, यिहाँ परमेश्वरसे चुनगैल् टुहाँर बहिन्या कलक एकठो मण्डली हो ओ हुँकाहार छाइ-छावन कलक उ मण्डलीक सदस्यहुँक हुइट।

यूहन्नक लिखल

तीसर चिठी

चिठीक परिचय

यी, यूहन्नक लिखल, तीसर चिठी हो। ऊ यी चिठी गायस नाउ रहल एक जन अगुवह लिखलह। चिठीम यूहन्ना गायसक प्रशंसा कर्ल, काकरकि ऊ विश्वासीहुँकन धेर सहायता कैरखलह, डियोत्रिफस दोषी रलक बात बटोइल, काकरकि हुँकाहार व्यवहार मजा नैरलहन, ओ डेमेत्रियस एक असल रलक बात बटोइल।

१ मै, एल्डर,

प्रिय संघारी गायसह यी चिठी लिखटु, जेहिह मै सत्य प्रेम कर्तु।

२ प्रिय संघारी, सब बातम टुहाँर भलो ह्वाए ओ आत्मिक जीवन स्वस्थ रहलअस शारीरिक जीवन फे स्वस्थ ह्वाए कैक मै प्रार्थना कर्तु। ३ कत्रा भैयाहुँक्रे आक टुँ सत्य हिसाबले चलल बात बटवैल त, मै एकदम आनन्दित हुइनु। टुँ जाट्टीसे सत्य अनुसार चलठो। ४ म्वार छाड़-छावन सत्य अनुसार चलठ कना बात सुन पैनासे धेर आनन्दक बात म्वार लाग और कौन हुइसेकी जे?

५ प्रिय संघारी, टुँ नैचिन्हल विश्वासी दादु-भैयन्हक सेवासत्कार कर्ना कामम समेत विश्वासयोग्य बाटो। ६ हुँक्रे मण्डलीक मनैन्हकठे टुहाँर देखाइल प्रेमक बारेम बट्वारखल। टुँ परमेश्वरह मन पर्ना तरिकाले ओसिन मनैन सहायता देना काम कर्तीरहहो। ७ काकरकि ख्रीष्टह विश्वास नैकरुइयनसे कुछु फे नैलेक हुँक्रे प्रभुक बारेम प्रचार करक लाग यात्रम निक्कल् हुइट। ८ उहओसे ओसिन मनैन्हक सेवासत्कार करपर्ठा। यदि कर्ली कलसे, सत्य बात फैलैना कामम हम्र फे हुँकन्हक सँगसँग सहभागी हुइठी।

९ मै मण्डलीह यी विषयम चिठी लिखक पठैनुहुँ, तर टुन्हक बीचम बरा हुइ खोजुइया डियोत्रिफस म्वार बात स्वीकार नैकरट। १० मै उहाँ जैम त, वाकर

कर्टीरहल कामक ओ हमार बिरोधम ऊ खराब बात बट्वैटी नेङ्गलक बात उठैम। ओत्रम सन्तुष्टी नैहोक उ नैचिन्हल विश्वासी दादु-भैयन स्वागत नैकरट। ऊ हुँकन स्वागत कर चहना मनैन रोक्ना केल नैहोक ओसिन मनैन मण्डलीमसे फे निक्रादेठा।

११ प्रिय भैयौ, खराब कामक देखासिकी जिन करो, बेनसे असल कामक देखासिकी करो। जे असल काम कर्ठा, ऊ परमेश्वरक सन्तान हो, ओ जे खराब काम कर्ठा, ऊ परमेश्वरह नैचिन्हट्। १२ डेमेत्रियसक बारेम त सब जन मजा बात बट्वैठ, ओ सत्यम चल्ठ कना बात हुँकाहार जीवनद्वारा सत्य फे अपन्हे साक्षी देठा। हम्र फे यी बातक साक्षी देठी ओ हमार साक्षी सत्य बा कना बात टुह फे जन्ठो।

१३ मै टुहन कहपर्ना बात त धेर बा, ओ मै चिठीम सबचिज लिख नैचाहटु। १४ बेनसे मै टुहन भट्ट भेट्ना ओ टुहनसे एककठे होक बातचित कर्ना आशा करटु।

१५ टुहिन शान्ति मिल। यिहाँक सक्कु जन टुहिन जयमसिह कैरख्ल, उहाँ रहल सक्कु संघरेन म्वार जयमसिह सुनादेहो।

शब्दक अर्थ

(नोट: ठल अक्षरम लिख्गैल थारु शब्दक पाछ कौष्ठम नेपाली शब्द फे देगैल बा।)

अगमवक्ता /अगमवाणी

अगमवक्ता कलक परमेश्वरक बलाइल व्यक्ति अर्थात् परमेश्वरक तर्फसे बोल्ना व्यक्ति या परमेश्वरक प्रवक्ता हुइट। अगमवक्तह कबुकाल “परमेश्वरक जन” (व्यवस्था ३३:१; १ शमूएल ६:६), ओ कबुकाल “परमेश्वरक दास” (२ राजा १०:१०; १७:१३) कैगिल् बा। हुँकन्हक ब्वालल् वचनह अगमवाणी कैजाए।

अगमवक्तहुँक परमेश्वरक स्वभाव, इच्छा, योजना, अर्ती, चेतावनी, ओ न्याय सम्बन्धी वचन मनैन देहँट। हुँक परमेश्वरसे पाइल वचन मनैन देना क्रमम कबुकाल भविष्यम हुइना घटनक बारेम फे कहँट। उदाहरणक रुपम एलीशा (२ राजा ६:१२) ओ आमोस (आमोस १ ओ २ अध्याय)। कुछ अगमवक्ताहुँक परमेश्वरक वचन लिख्ल। पुरान नियमम हुँकन्हक लिखल किताब धेर बा।

उ समयम भुटा अगमवक्ताहुँक फे रलह। हुँक आपन मनक बात बट्वाइँट, तर परमेश्वरसे पाइल वचन कैक दाबी करँट। परमेश्वर हुँकन नैबलैललन तर हुँक अपन्हे अगमवक्ता बनलह। हुँक मनैन परमेश्वरक आज्ञापालन कर लगाइक लाग नाहीं तर आपन स्वार्थी इच्छा पूरा करक लाग वचन ब्वालँट।

लौव नियमम फे अगमवक्तन्हक सेवा उल्लेख कैगिल् बा। पवित्र आत्मा विश्वासीहुँकन मण्डलीक हितक लाग अगमवाणी बोल्ना वरदान देठ (१ कोरिन्थी १२:१०)। पैल्ह शताब्दीम मण्डली स्थापना कर्ना कामम प्रेरितन्हक संगसंग अगमवक्ताहुँक फे धेर देन देल।

अनन्त जीवन

अनन्त जीवन कलक यी जीवनम येशू ख्रीष्टक सम्बन्धम रहक जीना ओ मुलसे स्वर्गम जैना जीवन हो (यूहन्ना १७:३-२६; १ यूहन्ना २:२४-२५)। मनै येशूकम

विश्वास कर्ल कलसे, हुँकन्हकम अनन्त जीवन शुरु हुइठन (यूहन्ना ३:१६), तर यी जीवनक पूर्णता भर हुँक मुलसे केल पैठ (१ कोरिन्थी १५:५२-५४)। हुँक पापक क्षमा पैठ ओ परमेश्वरक सन्तान हुइठ (यूहन्ना १:१२; १ यूहन्ना ३:१)।

अनुग्रह

बाइबलम अनुग्रह कलसे क्षमादान, मुक्तिदान, अचूक प्रेम, अपार कृपा आदि विषयह समेट्ठा। निगाहा, दया आदि शब्द फे अनुग्रहक अर्थ देठा। परमेश्वरक अनुग्रहक कारणले हम्र मुक्ति पैठी (एफिसी २:८; तीतस २:११)। हम्र पापी ओ परमेश्वरक विरोधी रहलम फे परमेश्वर आपन छावा येशू ख्रीष्टह हमन मुक्ति देहक लाग पठैल (रोमी ५:८)। येशूक मृत्युद्वारा परमेश्वर आपन पाप स्वीकार कर्ना ओ उहाँकम विश्वास कर्ना मनैन क्षमा देठ। मुक्ति कुई फे कमाइ नैस्याकट्, यी त परमेश्वरक अनुग्रहस्वरूप मनैन देगैल वरदान हो।

परमेश्वर आपन अनुग्रहद्वारा इस्राएलीहुँकन आपन मनै हुइक लाग रोज्लह (व्यवस्था ७:७-८)। मनै लौव हृदय पैना बात फे परमेश्वरक देहल अनुग्रहक वरदान हो कैक अगमवक्ताहुँक बुभल (इजकिएल १८:३१)। परमेश्वरक अपार कृपक कारणले केल मनै उहाँक पवित्र मन्दिरम जाइसेकना बात भजनसंग्रहम लिख्गैल् बा (भजनसंग्रह ५:७)।

येशूक सिखाइल वचनम फे धेरजसिन अनुग्रहक सिद्धान्त पाजैठा। जस्तै – काम करुइयन्हक आहानम, डान्चे समय केल काम करुइयन फे पूरा ज्याला पैठ (मत्ती २०:१-१६), बराभ्वाजक आहानम, निउँता पैना असम्भव मनै फे भ्वाजम सहभागी हुइ पैठ (लूका १४:१६-२४), हेराइल छावक आहानम, छोट्की छावा दण्ड पैना योग्यक रलसे फे घरमा स्वागत कैजिठा (लूका १५:११-२४)।

पावल धेरजसिन चिठीक शुरुम अभिवादन करबेर ओ अन्त्यम आशिषक कामना करबेर “अनुग्रह” शब्द प्रयोग कैरख्ल। पावल, रोमी १:१६-४:२५ म, मनै पापी बाट ओ परमेश्वरसे दूर होरल, तर परमेश्वर आपन अनुग्रहद्वारा हुँक कबु फे पाप नैकरलअस हुँकनसे व्यवहार कर्ठ। हम्र पापी ओ परमेश्वरक विरोधी रहलम फे परमेश्वर आपन छावा येशू ख्रीष्टह हमन मुक्ति देहक लाग पठैल (रोमी ५:८)। परमेश्वरक अनुग्रहक कारणले हम्र मुक्ति पैठी (एफिसी २:८; तीतस २:११)।

एल्डर

अघट्टेक जमानम धेरजसिन समाजम अनुभवी, प्रभावशाली, गन्नेमान्ने, परिपक्व मनै रलह। हुँक सामाजिक छलफल ओ क्रियाकलापम महत्वपूर्ण देन देहँट। हुँकन एल्डर कैजाए। इस्राएल देशम फे समाजम सरसल्लाह करक लाग, न्यायनिसाफ ओ शासन करक लाग एल्डरहुँक रलह। पुरान नियमम इस्राएलीन्हक बीचम हुँकन अगुवाई करक लाग परमेश्वर एल्डर नियुक्त करँट (प्रस्थान २४ अध्याय)। लौव नियमम मण्डलीम प्रचार कर्ना, रेखदेख कर्ना, सञ्चालन कर्ना, सिखैना एल्डरहुँक रलह (प्रेरित १५:६; २०:१७)। यूहन्ना एकठो एल्डर रलह (१ यहन्ना २), पत्रुस एकठो एल्डर रलह (१ पत्रुस ५:१)। पावल तीतसह मण्डलीम एल्डरहुँकन नियुक्त कर्ना आदेश देल (तीतस १:५)। मण्डली इतिहासम एल्डरहुँक विश्वासीहुँकन वचन प्रचार करक लाग, सिखाइक लाग, हुँकन्हक आत्मिक जीवनक रेखदेख करक लाग ओ मण्डलीम प्रशासनिक कामकाज करक लाग अधिकार पाइल् अगुवन रलह।

एल्डरहुँकन्हक नियुक्ति, चारित्रिक गुण ओ व्यवहार सम्बन्धम थप जानकारी पाइक लाग १ तिमोथी ३:१-६; तीतस १:६-९ हेरी।

कयिन

आदम ओ हव्वक बर्का छावा कयिन रह (उत्पत्ति ४:१) हुँकन्हक मन्हला छावा हाबिल रहल (उत्पत्ति ४:२)। कयिन आपन भैया हाबिलक हत्या करल (उत्पत्ति ४:८)। वास्तवम वाकर स्वभाव दुष्ट रलहस। वाकरम परमेश्वरक दण्ड पर्लस् त, ऊ परमेश्वरसे दूर हुइल्। हम्न कयिनअसक हुइ नैपरट (१ यूहन्ना ३:१२)। कयिनक बारेम थप जानकारी पाइक लाग उत्पत्ति ४:१-२४ हेरी।

खुशिक खबर (सुसमाचार)

साधारण हिसाबले खुशिक खबर कलक मजा खबर हो। तर बाइबलम, खुशिक खबर कलसे एकठो विशेष अर्थ लगटा। धेर वर्ष आघ, परमेश्वर इस्राएलीन मुक्ति देना बाचा कैरल्लह (यशैया ६:१-७)। परमेश्वर उ बाचा येशू ख्रीष्टकम पूरा कर्ल ओ सककुजन्हक लाग मुक्तिक ड्वार खोलदेल (कलस्सी १:१३)।

खुशिक खबर कलक यह हो कि येशू ख्रीष्ट सारा संसारह मुक्ति देना परमेश्वर हुइट, ओ उहाँ मनैन पापमसे मुक्ति दिहक लाग यी संसारम अइल (१ पत्रुस २:२४; रोमी ६:२३)। पापमसे मुक्ति पाइक लाग, मनै येशू ख्रीष्टकम विश्वास कर्ना बाहेक

और कुछ कर नैपरट् (यूहन्ना १:१२; ३:१६)। मनैन्हक लाग सबसे खुशिक खबर यहि हो।

दया

दया कलक औरजन्हकम दुख, अभाव, आपतविपत परल समयम, हुँकन सहायता करक लाग मनम अइना एकठो भावना हो। यहीह कबुकाल कृपा या निगाहा फे कैजिठा। परमेश्वर गरीब मनैन, टुवर लर्कन, विधवन ओ अरदेशीपरदेशीन दया करपठा कैक आपन वचनम कैरखल (भजनसंग्रह १४६:६; हितोपदेश १६:१७; जकरिया ७:९-१०; मीका ६:८)। परमेश्वर आपन करल सारा सृष्टिम दया कर्लबाट (भजनसंग्रह १४५:६), ओ उहाँ हमन दया कर्लक कारण हम्र मुक्ति पारखली (एफिसी २:४; तीतस ३:५)। येशू आपन चलन कल, “टुन्हक स्वर्गक परमेश्वर बाबा दयालु रहलअस, टुह फे दयालु होओ” (लूका ६:३६)। एकठो मुवमुव मनैयह देख्क सामरीया क्षेत्रक मनैयह दया लगलन् (लूका १०:३३)। दया एकठो भावना हो, जेहीह कामले ओ व्यवहारले व्यक्त कैजिठा।

न्यायक दिन

न्यायक दिन कलक इतिहासक अन्तिम दिन अर्थात् परमेश्वर सारा जगतक अन्तिम न्याय कर्ना दिन हो। उ दिन संसारक अन्त्य हुइयाबा ओ सबजन्हक अनन्त गनतव्य तोकजउइयाबा। परमेश्वरक प्रकट हुइल् इच्छम मनैन्हक जनाइल प्रतिक्रियक आधारम हमार न्याय कैजउइयाबा। हमार करल अनुभव, मनक विचार, मुहक बोली ओ करल क्रियाकलापह हमार न्याय कर्ना आधार मानजउइयाबा। सत्य परमप्रभु परमेश्वरक करल न्याय सब जन स्वीकार करुइयाबाट।

परमेश्वर

परमेश्वर आत्मा हुइलकओसे, उहाँह द्याख नैसेकजाइट् (रोमी १:२०; कलस्सी १:१५; १ तिमोथी १:१७; ६:१५-१६)। तर फे बाइबलम का लिखल बा कलसे उहाँ बोलठ (उत्पत्ती ३:८-१६; ६:१६; मर्कूस १:११), सुन्ठ (अय्यूब ३४:२८; भजनसंग्रह ११६:१), देख्ठ (भजनसंग्रह ३३:१३-१४; हितोपदेश ५:२१), रिसैठ (प्रस्थान २२:२४; रोमी १:१८, प्रेम कर्ठ (यूहन्ना ३:१६), ओ सोगैठ (हिब्रू ४:१५-१६)। परमेश्वर एक्क समयम सब ठाउँम बाट (भजनसंग्रह १३६:७-१०;

यर्मिया २३:२३-२४), उहाँ सब चिज जन्ठ (भजनसंग्रह १३६:१-४; दानियल २:२०-२२), उहाँ सक्कुनसे शक्तिशाली बाट (अय्यूब ४२:२; लूका १:३७), उहाँ सड्डभर पलबाट ओ पलरहुइयाबाट (१ तिमोथी १:१७; प्रकाश ११:१७; १५:७), ओ उहाँ कबु फे पाप नैकर्ल ओ कबु फे पाप करुइया नैहुइट (याकूब १:१३ १; पत्रुस १:१:१५)।

स्वर्ग, पृथ्वी ओ उहिम रहल सबचिज सृष्टि कर्ल (यर्मिया ५१:१५; हिब्रू २:१०)। उहाँ मनैन्हक भलो चहठ (यर्मिया २६:११)। उहओसे परमेश्वर मनैन पापमसे मुक्ति देना योजना बनाक उह अनुसार काम कर्ल। येशू ख्रीष्टकम विश्वास कर्लसे मुक्ति पैना बात बाइबलम लिखल बा (रोमी ५:१०; हिब्रू २:१४-१५)।

परमेश्वर तीनठो व्यक्तित्वम बाट: बाबा परमेश्वर, छावा परमेश्वर, ओ पवित्र आत्मा परमेश्वर (मर्कूस १:१०-११)। ख्रीष्टीयन इतिहासम यहीह त्रिएक परमेश्वर कैगिल् बा। हम्न बाइबलम का देख्ठी कलसे, हुइना त परमेश्वर तीनठो व्यक्तित्वम बाट, तर उहाँ एक्कठो परमेश्वर हुइट, तीनठो परमेश्वर नैहुइट (व्यवस्था ६:४)।

परमेश्वरक छावा (परमेश्वरको पुत्र)

परमेश्वर तीनठो व्यक्तित्वम बाट: परमेश्वर बाबा, परमेश्वर छावा, ओ परमेश्वर पवित्र आत्मा। येशू ख्रीष्ट परमेश्वरक छावा हुइट। परमेश्वरक छावा रलसे फे, उहाँ परमेश्वर बाबक सृजाइल नैहुइट। कन्या मरियमक कोखिमसे जर्मक उहाँ परमेश्वरक छावा हुइलक नैहुइट। उहाँ सड्डभर परमेश्वरक छावा पलबाट ओ पलरहुइयाबाट। उहाँ अधिकार, शक्ति, आदर, ओ अस्तित्वम परमेश्वर बाबसे कम नैहुइट। उहाँकम परमेश्वरकम रहपर्ना गुण रलकओसे, उहाँ परमेश्वरहुइट (यूहन्ना १:१-२; कलस्सी १:१५-२०; हिब्रू १)।

येशू ख्रीष्ट मनैया होक यी संसारम जर्म लेल त, उहाँकम मनैन्हक गुण फे थपगैलन। उहाँ परमेश्वर बाबक आज्ञाकारी होक जील ओ क्रूसम मुल। मनैया हुइलकओसे, उहाँ क्रूसम मुवबेर सारा मनैन्हक प्रतिनिधित्व कर्ल ओ सबजन्हक पाप बोक्ल (हिब्रू २:५-१८)।

परमेश्वरक सन्तान

परमेश्वरक सन्तान हुइना कलक मानवीय डाईबाबक सन्तान हुइनासे धेर फरक बात हो। उहाँक सन्तान हुइना कलक विशेष अनुग्रह, महान आशिष ओ उच्च सम्मान पैना बात हो। येशूह स्वीकर कर्ना ओ उहाँकम विश्वास कर्ना मनै

परमेश्वरक सन्तान हुइना अधिकार पैठ (यूहन्ना १:१२)। परमेश्वरक सन्तान कलक उहाँक गुण या स्वभाव रहल मनै अर्थात् पवित्र आत्मासे जन्मल मनै हुइत (यूहन्ना ३:६)। उहाँक सन्तान हुइल् मनै ठीक काम कर्ठ (१ यूहन्ना २:२६), पाप कर्टी नैरट (१ यूहन्ना ५:१८), पाप कर नैसेक्ट (१ यूहन्ना ३:६), प्रेम कर्ठ (१ यूहन्ना ४:७), येशू जो ख्रीष्ट हुइत कैक विश्वास कर्ठ (१ यूहन्ना ५:१)।

पवित्र आत्मा

पवित्र आत्मा कलक परमेश्वरऽ हुइत (प्रेरित ५:३-४; २ कोरिन्थी ३:१७-१८)। येशू ख्रीष्टकम विश्वास कर्ना मनैन्हकम पवित्र आत्मा बास कर्ठ (रोमी ५:५; ८:६)। पवित्र आत्मक सहायताले, ख्रीष्टीयनहुँक येशूह परमेश्वरक छावा कैक प्रचार कर्ठ (प्रेरित १:८), बाइबलक वचन बुभना शक्ति पैठ (यूहन्ना १६:१३), सेवा कर्ना अगुवाइ पैठ, आत्मक फारा फराइ सेक्ट, पापम नैफैस्ट, ओ लौव जीवन जीना स्वतन्त्रता पैठ (रोमी ८; गलाती ५:२२-२३)। परमेश्वरक योजना संसारम ओ मण्डलीम लागू कर्ना कामम सहायता पुगाइक लाग, पवित्र आत्मा ख्रीष्टीयनहुँकन धेर किसिमक वरदान देठ (रोमी १२:३-८; १ कोरिन्थी १२; एफिसी ४:७-१६; १ पत्रुस ४:१०-११)।

पाप

औरजन्हक हत्या कर्ना, या औरजहन सँटैना, या दुष्ट काम कर्ना केल परमेश्वरक नजरम पाप नैहो। तर बाइबलम पाप कलक सक्कु खराब विचार (जस्त: ल्वाभ कर्ना, हेल्हा कर्ना, बिह मुना, घमण्डी हुइना, ओ मूर्ख हुइना) ओ सक्कु खराब काम (जस्त: बेश्या काम कर्ना, चोर्ना, हत्या कर्ना, भग्ना कर्ना, लभर्ना, ठग्ना, बदला लेना) हो (मर्कूस ७:२१-२२; गलाती ५:१६-२१)।

पाप परमेश्वरक विरोधम हुइना काम हो, ओ सबसे छिटिमिटि पाप काम फे परमेश्वरक नजरम नैमजा काम हो। पाप मनैन परमेश्वरसे अल्गैलरठा (रोमी ६:२३)। पाप कर्लक कारण मनैन्हक जीवनम डर, शर्म, ओ दु:ख आइल (उत्पत्ती ३)। अत्र केल नैहोक, मनै मुव पर्ना फे हुइल् (रोमी ६:२३)।

पाप साधारण बात नै हो। बास्तवम मनै पापक बन्धनम परल बाट। पापक यी बन्धनमसे मनै अपन्हे मुक्ति पाइ नैसेक्ट। यी बन्धनमसे मुक्ति पाइक लाग, मनै आपन-आपन पापी मन घुमाइपर्ठा ओ येशूकम विश्वास कैक परमेश्वरकठे आइपर्ठा (मर्कूस १:४; यूहन्ना ३:१६)।

पापमसे मुक्ति पैना कलक पापक दण्डसे बचना हो। हुइना त, येशूकम विश्वास करुइयन पूरा रूपम पापमसे अलगौना सम्भव नैहो, तर, परमेश्वरक आत्मक सहायताले, हुँकरु आपन मनह पापओर जाइ नैदेना सम्भावना भर बा। असिक, हुँकरु परमेश्वरक उपस्थितिम आनन्दित ओ स्वतन्त्र जीवन जीठ (रोमी ६-८)।

पापी मन घुमाक परमेश्वरकठे अइना (पश्चात्ताप)

“मै पापी हुइहुँ, परमेश्वरसे म्वार बिग्रलुसम्बन्ध ठीक बनाइपर्ना बा” कैक सौँचना, ओ “पाप धिनलगिटिक गलती बात हो ओ मै आपन जीवनम पाप नैचहटुँ” कैक निर्णय कर्ना काम पापी मन घुमाक परमेश्वरकठे अइना हो (मर्कूस १:४-५)। पापी मन घुमाक परमेश्वरकठे आइल मनैन्हक सौँचविचार, कामकाज, रहनसहन, सक्कु क्षेत्रम, परिवर्तन हुइलूरठन (प्रेरित २६:१६-२०)।

ख्रीष्टीयन जीवनम आपन पापी मन घुमाक परमेश्वरकठे अइना सबसे पैलहक कदम हो। पापी मन घुमाक परमेश्वरकठे अइना शक्ति परमेश्वर देठ। पापी मन घुमाक परमेश्वरकठे नैआइट्सम, पापमसे छुटकारा पैना सम्भव नैहो (हितोपदेश २८:१३; मत्ती ५:३-४; मर्कूस १:४, १५; प्रेरित २:३७-३८; २०:२१; २ कोरन्थी ७:१०; २ पत्रुस ३:६)।

प्रार्थना कर्ना

परमेश्वरसे प्रार्थना कर्ना कलक साधारण अर्थम ख्रीष्टीयनहुँकरु परमेश्वरसे बातचित कर्ना हो। अत्र केल नैहोक, परमेश्वरसे प्रार्थना कर्ना कलक उहाँक आराधना ओ प्रशंसा कर्ना (भजनसंग्रह १४४-१५०), उहाँह धन्यवाद चहैना (भजनसंग्रह १३६; १ थिस्सलोनिकी ५:१६-१८), उहाँसेकि उहाँक आघ आपन पाप स्वीकार कर्ना, ओ आपन पाप क्षमक लाग उहाँसे पुकारा कर्ना फे हो (दानियल ६:३-२३; १ यूहन्ना १:६)। परमेश्वरसे आपन घटिकमीक माग कर्ना फे हो (याकूब १:५; फिलिप्पी ४:६-८)।

यदि हम्र परमेश्वरक आज्ञाकारी जीवन जीलबाटी कलसे, परमेश्वर हमार करल प्रार्थना सुन्ठ ओ वाकर उत्तर देठ (भजनसंग्रह ६६:१६-२०; हितोपदेश १५:२६)। परमेश्वरसे प्रार्थना कर्ना काम उहाँसे सम्बन्ध बहैना एकठो मजा तरिका फे हो। परमेश्वरसे प्रार्थना कर्लकओसे, उहाँकम विश्वास करल मनैन्हक जीवनम भारी-

भारी शक्तिक काम हुइल बाटन (याकूब ५:१३-१८)। उहमार परमेश्वरसे प्रार्थना कर्ना ख्रीष्टयन जीवनक एकठो मुख्य भाग हो।

प्रेरित

बाइबलम प्रेरित कलक परमेश्वरक खुशिक खबर प्रचार कर पठाइक लाग येशू ख्रीष्टक ज्वाजल बाह जन चेलावँ हुँइट (मर्कूस ३:१४; ६:३०)। येशू ख्रीष्ट स्वर्गम उठागैल त, उहाँक कामह उह प्रेरितहुँकर निरन्तरता देल। हुँकर मुवलमसे फेदोस जीलक येशू ख्रीष्टह आपन आँखिले देखलह ओ परमेश्वरक आत्मले भरलरलह। हुँकर ठाउँ-ठाउँम मण्डली स्थापना कर्ल, ओ मनैन परमेश्वरक वचन सिखैल। पाछ जाक यी बाह जन बाहेक पावल लगायत और मनै फे प्रेरितम गनगैल (प्रेरित १४:१४; १ कोरिन्थी ६:१-२)। येशूक ज्वाजल, ओ पाछ थपगैल, उह प्रेरितहुँकर मण्डलीक जग हुइल।

मण्डली

मण्डली कलक ख्रीष्टीयनहुँकन्हक भेला हो। उ भेलम हुँकर परमेश्वरक प्रशंसा ओ आराधना कर्ठ, संगती कर्ठ, एक औरजहन उत्साह देठ, ओ परमेश्वरक वचन सुन्ठ आदी (प्रेरित २:४२-४७)। असिक हुँकर विश्वासम बलगर ओ परिपक्व हुइटी जैठ। अगुवन धेर जसिन समयम परमेश्वरक वचनमसे सिखैठ। हम्म बुभपर्ना महत्वपूर्ण बात का हो कलसे, मण्डली कलक मण्डली घर नैहो, तर येशू ख्रीष्टकम विश्वास करल मनैन्हक विशेष भेला हो।

मुक्ति

मुक्ति कलक खतरामसे बँचाजैना ओ सुरक्षित ठाउँम स्वतन्त्र रूपले जीए पैना हो। बाइबलम मुक्ति कलक पापक बन्धनमसे ओ परमेश्वरक दण्डसे छुटकारा पैना (यूहन्ना ३:१६; रोमी ६:२३), ओ लौव जीवन पैना हो। हम्म पापक बन्धन ओ परमेश्वरक दण्डसे छुटकारा पाइल मनै यी लौव जीवन जीए सेकठी (रोमी ६:१-१३; ८:१, ३२-३४; कलस्सी १:२२), ओ परमेश्वरक चाहल अनुसार यी जीवन जीएक लाग शक्ति पैठी (रोमी ८; एफिसी ५:१८; कलस्सी १:६-१२)। बाइबलक

हिसाबले मनैन पापमसे बँचाइ सेकना व्यक्ति येशू ख्रीष्टकम विश्वास कैक केल मुक्ति पाजैठा (प्रेरित ४:१२; १ तिमोथी २:५)।

येशू ख्रीष्ट

हुइना त येशूक अस्तित्व सड्डभर पलबाटन, तर फे उहाँ लगभग २००० वर्ष आघ इस्राएल देशम मनैया होक जर्मलह। येशू ख्रीष्ट एकमुष्ठ रुपम बाइबलक ओ ख्रीष्टीय विश्वासक केन्द्रीय पात्र हुइत। उहाँ एकठो मनैया केल नैरलह, तर परमेश्वर फे रलह। उहओसे उहाँकम परमेश्वरक गुण रलहन। उहाँ मनैया होक जर्मल त, उहाँकम रहल परमेश्वरक गुण नैहरैलन (यूहन्ना १:१-२; कलस्सी १:१५-२०; हिब्रू १)। असिक उहाँ परमेश्वर त पलरलह ओ उह समयम मनैया फे हुइल (फिलिप्पी २:५-११)। उहाँ मनैया होक जर्मलसे फे, उहाँकम पाप स्वभाव नैरलहन। उहाँ धेर फ्यारा पापम फँसना अवस्थम पर्ल, तर पापम कबु फे नैफँसल (हिब्रू ४:१४-१६)।

परमेश्वरक राज्य आइल देखैटी, येशू खुशिक खबर प्रचार कर्ल ओ उ राज्यम प्रवेश पाइक लाग आपन-आपन पापी मन घुमाक परमेश्वरकठे आइपर्ना बात सिखैल (मर्कूस १:१५)। मनैन पापमसे मुक्ति दिहक लाग, परमेश्वरक योजना अनुसार उहाँ क्रूसम मुल। उहाँक मुवल शरीरह मनै एकठो गज्यम ढर्ल। वाकर तीसर दिन, उहाँ मुवलमसे फेदोस जीगैल (मर्कूस १५-१६)। फेदोस जीलक चालीसवाँ दिनम, धेर मनै देख्टी-देख्टी, उहाँ स्वर्गम उठागैल (लूका २४:५०-५२)। आजकाल उहाँ सर्वशक्तिमान परमेश्वरक दाहिन पाञ्जर बैठल बाट (हिब्रू १:३; १०:१२)।

येशू एक दिन आपन राज्य स्थापना कर फेदोस अउइयाबाट। तबदोस येशू ख्रीष्टकम विश्वास करल मनै स्वर्गम सड्डभर परमेश्वरकसँग रहपैहीं, तर उहाँकम विश्वास नैकरल मनै नरकम जैहीं (मत्ती २४-२५)।

विश्वास

सामान्य रुपम विश्वास कर्ना कलक केक्रोम भर पर्ना हो। बाइबलम विश्वास कर्ना कलक खास कैक परमेश्वरकम भर पर्ना हो। परमेश्वरकम भर पर्ना कलक द्याख नैसेकजैना बातम विश्वास कर्ना हो (हिब्रू ११:१)। हम्न परमेश्वरह ओ हमार लाग करल परमेश्वरक प्रतिज्ञा भविष्यम कसिक पूरा हुई कना बात आँखिले द्याख

नैसेकटी। तर हम्न बाइबलम परमेश्वरक कहल बात विश्वास कठी, जसिन कि, उहाँ हमन प्रेम कर्ठ (१ यूहन्ना ४:८-१०), उहाँ हमार वास्ता कर्ठ (१ पत्रुस ५:७) ओ आत्मिक जीवन जीएक लाग, आवश्यक पर्ना सब चिज उहाँ हमन देरख्ल (२ पत्रुस १:३-४)। हुइना त, रुख्वाबरेख्वा या चिरैँचुरुङ्गन या हमार आसपासम रहल भौतिक वस्तु द्याखअस असिन बात हम्न आँखिले निदेख्ठी, तर फे हम्न असिन बात सत्य हो कैक विश्वास कठी ओ उह अनुसार जीठी।

उदाहरणक लाग, मानि ले डगरीम जैटी-जैटी, एकठो सङ्गवा रहल ठाउँम पुगठी। उ सङ्गवा बल्या बा कैक विचार कठी, तर उ सङ्गवमसे उपार निजैटी कलसे, उ सङ्गवा जाट्टीसे बल्या बा कैक हम्न विश्वास निकर्ठी। तर, यदि उ सङ्गवमसे उपार जैठी कलसे, उ सङ्गवम भर पर्ली कना बात थाहाँ हुइठा। यी बात सङ्गवम विश्वास करल बात हो।

ओसहेँक, परमेश्वर परम उपकारी बाट (भजनसंग्रह १४५:८-९; मर्कूस १०:१८), उहाँ हमन मुक्ति देठ (एफिसी २:८-९), ओ उहाँ हर समयम हमार भलो हुइना काम कर्ठीबाट कना बात हम्न विश्वास करपर्ठा (रोमी ८:२८)।

शैतान

शैतान भूतन्हक रज्वा हो (मर्कूस ३:१३) ओ परमेश्वरक मुख्य शत्रु हो। उ फे आत्मा रलकओर्से, ओही द्याख नैसेकजाइट्। वाकर मुख्य काम कलक परमेश्वरक विरोध कर्ना हुइस, तर शैतान मनपर्दी कुछु फे कर नैपाइट्(अय्यूब १)। शैतान परमेश्वरक विरोध केल नैकरट, तर मनैन दुःख देना काम फे कर्ठा। उ मनैन्हकम पापी मन जगादेठा, उहओर्से मनै औरजहन ठग्ना, ढँठ्ना, लुट्ना, ओ मुवैना काम कर्ठ। असिक मनै पापम फँसठ (यूहन्ना ८:४४; १३:२; २ कोरिन्थी २:११; एफिसी ६:११; १ तिमोथी २:२४)। शैतान मनैन परमेश्वरकम विश्वास कर नैदिहट् (२ कोरिन्थी ४:४)। उ परमेश्वरक करल सृष्टि ओ योजना भताभुङ्ग पर्ना काम कर्ठा, तर परमेश्वरसे अनुमति पाइलसम केल बिगार करसेकठा (अय्यूब १:१२; २:६)।

हम्न परमेश्वरक शक्तिले केल शैतानह हराइसेकठी। यदि हम्न शैतानक विरोध कर्बी कलसे, उ हमारठेसे भग्नेबा (याकूब ४:७)। क्रूसम टङ्गागिल येशू शैतानह हरारख्ल (हिब्रू २:१४-१५)। उह फे संसारम वाकर शक्ति आम्हीसम पलबाटस। तर

अन्तम, शैतानह सह निसेकजैना दुःख भ्वाग परहिंस, काकरकि उ आगीक भट्ठीम फाँकजैनेबा (प्रकाश २०:७-१०)।

संसार

सामान्य हिसाबले संसार कलक मनै देख्ना, छुना, ओ अनुभव कर्ना सारा भौतिक जगत हो। बाइबलम, खासकैक यूहन्नक लिखल किताबम “संसार” शब्द धेर ठाउँम प्रयोग हुइल् बा ओ अवस्था अनुसार याकर अर्थ फे फरक फरक बा।

१. भौतिक संसार (प्रेरित १७:२४) – परमेश्वरक सृष्टि करल संसार।
२. पृथ्वी (१ यूहन्ना ४:६) – परमेश्वर आपन छावह पठाइल् ठाउँ, संसार।
३. मानव संसार (यूहन्ना ३:१६) – परमेश्वरक प्रेम करल करल मनैन्हक संसार।
४. मानव जीवनशैली (१ यूहन्ना ३:१७) – मनैन्हक दुखसुख, धनसम्पत्ति, खुसी, आनन्द, इच्छा, चाहना रहल संसार।
५. दुष्ट संसार (१ यूहन्ना ४:१६) – परमेश्वरक ओ उहाँक मनैन्हक विरोध कर्ना संसार, भुटा शिक्षा सिखैना संसार।

पैल्ह चारठो बुँदा अनुसार “संसार” शब्दक नकारात्मक अर्थ नैहो। तर पाँचवाँ बुँदा अनुसार मनैन्हक मन स्वार्थी चाहना, खराब इच्छा, लालच, रिस, घमण्ड आदिले भरल बा। ओसिन मनै संसारक मनै कैजिठा ओ हुँकनसे परमेश्वर सम्बन्ध कर नैसेक्ट। दुष्ट चाहना ओ घमण्डले भरल घिनलगिटिक यी संसारह पवित्र परमेश्वर द्याख नैसेक्ट।

ख्रीष्टीयनहुँक्र यी संसारम रलसे फे संसारक मनैन्हक विशेषता अनुसार जीवन नैजीएपरट्, तर आपनम संसारक पापक दाग लाग नैदेहपरट् ओ पवित्र परमेश्वरक चाहना अनुसार जीवन जीएपर्ठा।